

Tur cos a normaliza:

Centurion Casino a cancela su debe cu Silvermoon

ORANJESTAD(AAN) -- DIARIO tabata siguiendo di cerca e desaroyonan di e pago cu Centurion Casino mester haci na Silvermoon, manera a keda palabra den e acuerdo cu ambos partido a firma dilanti Juez.

Dialuna siman pasa e partidonan a yega na un areglo durante tratamiento di e caso den Corte, caminda abogado mr. Wever di Silvermoon a

presenta un proposicion di acuerdo riba papel y esaki tabata e base pa a formula un acuerdo. Promer cu ambos partido a firma un acuerdo abogado mr. Andin Bikker di Centurion Casino a pidi pa haci cierto cambionan den e proposicion cual Juez mr. Mouton a haya cu tabata na su lugar.

Na dado momento e gerente general di Silvermoon a tuma

un posicion di no kier basha awa den biña o sea bira mas flexibel pa por realiza un acuerdo cu Centurion. Juez mr. Mouton a hala su atencion na un manera masha fini cu e mester corda cu loke el a laga haci cu e casino no por worde tolera. No por laga cera un casino cu ta huur cu otro compania y pone guardia di seguridad pa evita cu cualkier hende ta drenta. E hecho cu Centurion Casino a paga cu cheque cu no tabatin fondo no ta corecto pero esey no ta hustifica pa Silvermoon tuma ley den man manera el a haci.

E ponencia di Juez a pone cu tanto abogado mr. Wever como e hefe di accounting di Silvermoon a bay papia cu e gerente general mustrand e cu ta mihor e acepta e condicionnan cu Centurion ta pidi pasobra sino e caso ta muestra no na nan ventaha. E gerente general a bin compronde cu e no por tuma e actitud cu el a tuma y esaki a pone tambe cu e partidonan a yega na un acuerdo.

E acuerdo cu e partidonan a

yega na dje basicamente ta cu dia 18 di Januari 2001 ta e "deadline" pa Centurion Casino paga e debe cu tin cu ta ser calcula den careda di 100 mil dollar. Si Centurion Casino no cumpli, e ora ey Silvermoon tin e derecho pa tuma e casino over.

E parti interesante di e caso aki tabata e hecho cu Centurion Casino a haya un accionista nobo cu ta haci cu por paga e debe pero tabatin mester di tempo pa e parti legal keda completa. Ademas Centurion Casino tabata dispuesto pa paga e asina yama "drop tax" cu mester a paga promer cu 15 di Januari 2001. Nan a autoriza deurwaarder Civil pa entrega Silvermoon e placa cu tabatin e momento ey ainda den banco di e casino cu tabata ser calcula na mas o menos 20 mil dollar. Un desaroyo positivo pa Centurion Casino tabata cu nan a haya bek di Ontvanger un gran parti di e placa cu Ontvanger a laga pone beslag ariba. Manera ta conoci, Ontvanger a laga pone beslag riba 110

mil Florin cu segun Ontvanger Centurion Casino debe. Abogado mr. Bikker for di promer instante a muestra cu esaki no ta corecto y el a haya razon ora cu oficina di accounting a muestra cu loke Centurion Casino debe Ontvanger ta 40 mil Florin. Si man pasa Centurion Casino a haya e placa restante y ayera nan a cumpli cu e ultimo obligacion cu nan tabatin esta a paga e debe na Silvermoon. Esey ta trece cune cu henter e situacion entre Centurion Casino y Silvermoon a normalisa.

Pa loke ta trata un di e accionistanan den Centurion Casino cu ta encarcela na Hulanda como sospechoso di ta meti den narcotrafico, ta asina cu e accionista nobo, un operador di un otro casino, a cuminsa tur e accionnan di e accionista di Hulanda. Esey ta nifica cu actualmente den Centurion Casino no tin ningun hende cu ta ser sospecha di a haci algo malo contra ley, cual ta duna e casino un bon imagen.

Stranhero ta habri mas negoshi pa nan famia bin traha aki

ORANJESTAD (AAN): Un biaha mas e asunto di matrimonio ficticio ta bin dilanti. Ta parce cu semper e mesun disco bieu ta worde toca di nobo, pero te ainda nada concreto a worde haci pa combati e asunto. Esey ta bin djis debi na e hecho, cu ta casi imposible pa haci algo contra dje.

De vez en cuando prensa ta publica e "Lista di Casamento" cu e speranza cu cualkier persona cu ripara un 'matrimonio ficticio' por avisar autoridad respectu e asunto.

Ta un secreto publico, cu esnan cu ta somete nan mes na e matrimonio ficticio aki, ta haci esey contra pago. Nan ta haya un suma di placa den nan man, djis pa yuda e 'partner' haya su nacionalidad Hulandes. Despues di esey, e portanan di cas ta habri y un fluho di "yiu, ruman, suegro, comer, comper, sobrino, primo, etc." ta bin di exterior pa bin biba na Aruba.

DIARIO ta na altura di e.o. propietario di un Salon di Beyeza na Aruba, cu awor ta sigui cu su triki sushi pa asina habri porta pa mas di su famianan bin biba riba e isla aki. Awor hasta un Fruteria a worde habri pa asina trece wela, bisanieto, primo, prima, etc., pa bin traha eyden.

Kico ta socede e ora? Un cantidad di mucha ta bin Aruba pero nan NO ta worde inclui den e sistema di educacion di e isla aki. Muchanan cu henter dia ta 'slenter' riba caya sin nada di haci, nan no ta bay school, y nan vocabulario ta yen di palabra mahos.

E pregunta ta: Instancianan oficial manera Departamento di DOOV, of Departamento di Labor, of Enseñanza, no

por haci algo contra tur esaki?

E 'importacion di famia' aki ta cuminsa sali for di control. Nan ta sigui trece mas 'famia/trahador', mientras na Aruba mes tin suficiente hende sin empleo.

E esencia principal ta cu algo mester worde haci pronto contra e tipo di matrimonionan ficticio, como tambe comerciantenan stranhero cu ta usa cierto triki sushi pa por trece nan demas familiar na Aruba.

